

**განმარტებითი ბარათი
საქართველოს კანონის პროექტზე**

„სახელმწიფო შესყიდვების შესახებ“ საქართველოს კანონში ცვლილების შეტანის თაობაზე“

ა) ზოგადი ინფორმაცია კანონპროექტის შესახებ:

ა.ა) კანონპროექტის მიღების მიზეზი:

ა.ა.ა) პრობლემა, რომლის გადაჭრასაც მიზნად ისახავს კანონპროექტი:

სახელმწიფო შესყიდვებისთვის განკუთვნილი ფულადი სახსრების რაციონალურად, გამჭვირვალედ და კანონის მოთხოვნათა დაცვით ხარჯვის უზრუნველყოფის, შემსყიდველი ორგანიზაციების საქმიანობის ეფექტიანობისა და ინსტიტუციური მოქნილობის გაძლიერების, აგრეთვე სახელმწიფო შესყიდვების პროცედურებში ბიზნეს სუბიექტებისთვის კიდევ უფრო კონკურენტუნარიანი და მიმზიდველი გარემოს ფორმირების მიზნით, წარმოდგენილი კანონპროექტი მიზნად ისახავს „სახელმწიფო შესყიდვების შესახებ“ საქართველოს კანონით დადგენილი სამართლებრივი ჩარჩოს ცვლილებას გარკვეულწილად. ამასთანავე, ინიციატივა ემსახურება სახელმწიფო შესყიდვების ერთიანი ელექტრონული სისტემის შემდგომ სრულყოფას, მისი ფუნქციური შესაძლებლობების გაფართოებასა და ახალი მოდულების ინტეგრაციას, რაც საბოლოო ჯამში ხელს შეუწყობს სახელმწიფო შესყიდვების სისტემის ინსტიტუციურ განვითარებას, გამჭვირვალობის სტანდარტების ამაღლებასა და ეფექტიანობის შემდგომ განმტკიცებას.

სახელმწიფო შესყიდვების განხორციელებისას შემსყიდველი ორგანიზაციების მოქნილობის გასაუმჯობესებლად კანონპროექტი ითვალისწინებს სახელმწიფო შესყიდვების ახალი ინსტრუმენტების დანერგვას, რაც, თავისი არსით, გულისხმობს დამატებით საშუალებებს, რომელთა მიხედვითაც შესაძლებელია ახლებურად წარიმართოს სახელმწიფო შესყიდვები. წინამდებარე კანონპროექტით წარმოდგენილია სახელმწიფო შესყიდვის შემდეგი ინსტრუმენტები: ჩარჩოშეთანხმება და ელექტრონული კატალოგი. აღნიშნული ინსტრუმენტების გამოყენებით შესყიდვის განხორციელებისას შემსყიდველი ორგანიზაციები და ეკონომიკური ოპერატორები შეძლებენ როგორც ადამიანური, ისე ფინანსური რესურსების დაზოგვას და მათ ეფექტიან გამოყენებას.

გარდა ზემოაღნიშნულისა, აღსანიშნავია, რომ წარმოდგენილი კანონპროექტი განსაკუთრებულ ყურადღებას ამახვილებს მცირე და საშუალო ბიზნესის განვითარების ხელშეწყობაზე, რაც გამოიხატება ქვეკონტრაქტორის ცნების ინსტიტუციურ დანერგვასა და მისი გამოყენების სამართლებრივი ჩარჩოს დეტალურ რეგულირებაში. აღნიშნული სიახლე მიზნად ისახავს სახელმწიფო შესყიდვების პროცესში უფრო ფართო მონაწილეობის უზრუნველყოფას, განსაკუთრებით იმ ეკონომიკური სუბიექტებისთვის, რომელთაც დამოუკიდებლად, ძირითადი ეკონომიკური ოპერატორის სტატუსით მონაწილეობა შეზღუდულად შეუძლიათ. ქვეკონტრაქტორის მექანიზმის დანერგვა ხელს შეუწყობს ბაზარზე კონკურენციის გაღრმავებას, რესურსების ეფექტიან გადანაწილებასა და ბიზნესსუბიექტებს შორის თანამშრომლობის კულტურის განვითარებას. ამასთანავე, კანონპროექტი ითვალისწინებს ქვეკონტრაქტორებთან დაკავშირებული სამართლებრივი ურთიერთობების გამჭვირვალე და პროგნოზირებადი წესების ჩამოყალიბებას, მათ შორის

ქვეკონტრაქტორების შერჩევის, ჩართულობის ფარგლებში, პასუხისმგებლობის განაწილებისა და კონტროლის მექანიზმების მკაფიო განსაზღვრას. აღნიშნული რეგულაციები ასევე უზრუნველყოფს, რომ ქვეკონტრაქტორების ჩართულობა განხორციელდეს კეთილსინდისიერების, თანასწორობისა და არადისკრიმინაციული მიდგომების საფუძველზე, რაც, თავის მხრივ, ზრდის როგორც მცირე და საშუალო ბიზნესის ეკონომიკურ შესაძლებლობებს, ისე მთლიანად სახელმწიფო შესყიდვების სისტემის ეფექტიანობას.

ამავდროულად, კანონპროექტის ერთ-ერთ მნიშვნელოვან მიზანს წარმოადგენს სახელმწიფო შესყიდვების განხორციელების პროცესში შემსყიდველი ორგანიზაციების მოქნილობის გაზრდა, რაც მიიღწევა კანონის მოქმედების სფეროდან დამატებითი, მიზნობრივად განსაზღვრული გამონაკლისების დადგენის გზით. აღნიშნული მიდგომა ეფუძნება პრაქტიკულ საჭიროებებს და მიზნად ისახავს იმგვარი სპეციფიკური შემთხვევების სამართლებრივად ადეკვატურ რეგულირებას, სადაც არსებული ზოგადი პროცედურების გამოყენება დაკავშირებულია გაუმართლებელ ადმინისტრაციულ ტვირთთან ან ობიექტურ სირთულეებთან. აღსანიშნავია, რომ კანონპროექტით გათვალისწინებულ გამონაკლისებთან დაკავშირებული შესყიდვების სახელმწიფო შესყიდვების მარეგულირებელი კანონმდებლობის სრული დაცვით განხორციელება, დღეის მდგომარეობით, ზოგიერთი შემსყიდველი ორგანიზაციისთვის გარკვეულ პრაქტიკულ დაბრკოლებებს წარმოშობს. მაგალითად, უმაღლესი საგანმანათლებლო დაწესებულებების მიერ არარეზიდენტი დაწესებულებებისა და საერთაშორისო ორგანიზაციებისგან საერთაშორისო აკრედიტაციის, ავტორიზაციის ან გარე შეფასების მოპოვების მიზნით მომსახურების შესყიდვა, აგრეთვე საერთაშორისო ორგანიზაციებში გაწევრიანებასთან და საერთაშორისო ღონისძიებებში მონაწილეობის საწევრო ან სარეგისტრაციო გადასახადების გადახდასთან დაკავშირებული ოპერაციები, ასევე შემსყიდველი ორგანიზაციის მიერ სხვა შემსყიდველი ორგანიზაციისგან იმ ექსკლუზიური მომსახურების შესყიდვა, რომლის გაწევის უფლებაც სხვა შემსყიდველ ორგანიზაციას კანონით ან კანონის შესაბამისად მიენიჭა, თავისი შინაარსით წარმოადგენს იმგვარ ურთიერთობებს, რომლებიც რთულად ექვემდებარება კონკურენტული სატენდერო პროცედურების სტანდარტულ მოდელს. კერძოდ, ასეთ შემთხვევებში მომსახურების მიმწოდებელი, როგორც წესი, წინასწარ განსაზღვრულია და დაკავშირებულია კონკრეტულ საერთაშორისო ინსტიტუციასთან, აკრედიტაციის გამცემ ორგანოსთან ან წარმოადგენს კანონმდებლობით განსაზღვრულ პირს, რაც გამორიცხავს ალტერნატიული მომწოდებლების არსებობასა და კონკურენციის უზრუნველყოფის შესაძლებლობას. შესაბამისად, აღნიშნული ტიპის შესყიდვებზე მოქმედი სტანდარტული პროცედურების გავრცელება იწვევს პროცესის გაუმართლებელ გაჭიანურებას, ადმინისტრაციული რესურსების არაეფექტიან გამოყენებასა და ზოგ შემთხვევაში – საერთაშორისო ვალდებულებების დროულად შესრულების შეფერხებას. ამ გარემოებების გათვალისწინებით, კანონპროექტი ითვალისწინებს შესაბამისი გამონაკლისების დაწესებას, რაც უზრუნველყოფს შემსყიდველი ორგანიზაციების ოპერატიულობასა და ფუნქციურ ეფექტიანობას.

ამასთან, საგულისხმოა, რომ წარმოდგენილი „სახელმწიფო შესყიდვების შესახებ“ საქართველოს კანონში ცვლილების შეტანის თაობაზე საქართველოს კანონის პროექტით ახლებურად ყალიბდება შესყიდვებში მონაწილე არაკეთილსინდისიერ პირთა რეესტრის – „შავი სიის“ ცნება, რაც დაკავშირებულია ერთი მხრივ ახალი სახელმწიფო შესყიდვის ინსტრუმენტის – ჩარჩო შეთანხმების კანონმდებლობაში ინტეგრაციასთან და მეორე მხრივ,

შავ სიაში რეგისტრაციის ვადის ახლებურად განსაზღვრასთან, კერძოდ, წარმოდგენილი კანონპროექტი ითვალისწინებს ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენის შემთხვევაში შესაძლებელი იქნება მიმწოდებლის შავ სიაში რეგისტრაცია ორი წლის ვადით (ნაცვლად ერთი წლისა), რაც წარმოადგენს შედარებით მკაცრ, თუმცა მიზნობრივად დასაბუთებულ ღონისძიებას. აღნიშნული რეგულაცია ემსახურება როგორც პრევენციულ, ისე სანქციურ მიზნებს — ერთი მხრივ, ხელს უწყობს ჯანსაღი კონკურენციის გარემოს განმტკიცებას, ხოლო მეორე მხრივ, ამცირებს სისტემაში არაკეთილსინდისიერი მონაწილეების ჩართულობის რისკებს. ამასთან, წარმოდგენილი პროექტით სახელმწიფო შესყიდვებში მონაწილეობა ან/და ხელშეკრულების დადება ეკრძალება აგრეთვე ყველა იმ ეკონომიკურ ოპერატორს, რომლის დამფუძნებელი ან/და წილის მფლობელი არის შავ სიაში რეგისტრირებული ეკონომიკური ოპერატორი, აგრეთვე – იმ ეკონომიკურ ოპერატორს, რომელშიც შავ სიაში რეგისტრირებული ეკონომიკური ოპერატორის ხელმძღვანელობასა და წარმომადგენლობაზე უფლებამოსილ პირს იგივე თანამდებობა უკავია ან/და იგი ფლობს კანონქვემდებარე ნორმატიული აქტით განსაზღვრულ წილს.

ამავდროულად, სახელმწიფო შესყიდვებიდან დანაშაულებრივ საქმიანობასთან დაკავშირებული პირების გამორიცხვის უზრუნველსაყოფად, წარმოდგენილი პროექტი ითვალისწინებს შემსყიდველი ორგანიზაციის უფლებამოსილებას, მოახდინოს პრეტენდენტის დისკვალიფიკაცია გარკვეულ დანაშაულებებთან მიმართებით ნასამართლობის არსებობისას. კერძოდ, იგი შესაძლებლობას იძლევა, რომ კორუფციული შინაარსის დანაშაულებების, აგრეთვე თაღლითობის, ფულის გათეთრების, ტერორიზმის, ტრეფიკინგისა და სახელმწიფოს წინააღმდეგ მიმართულ სხვა დანაშაულებებში ნასამართლევა პირებმა ვერ მიიღონ მონაწილეობა მაღალი ღირებულების სახელმწიფო შესყიდვებში (თუ შესასყიდი საქონლის, მომსახურების ან სამუშაოს სავარაუდო ღირებულება შეადგენს ან აღემატება კანონქვემდებარე აქტით დადგენილ ზღვარს). საგულისხმოა, რომ მოქმედი კანონმდებლობითაც შემსყიდველი ორგანიზაცია უფლებამოსილია, კანონქვემდებარე ნორმატიული აქტით დადგენილი წესით, მოახდინოს პრეტენდენტის დისკვალიფიკაცია პროექტით წარმოდგენილ შემთხვევებში, თუმცა ცვლილების მიზანს მძიმე და განსაკუთრებით მძიმე, ასევე მაღალი საზოგადოებრივი საფრთხის მქონე დანაშაულებთან მიმართებით დამატებითი აქცენტის გაკეთება და შემსყიდველი ორგანიზაციებისათვის უფრო მკაფიო მითითებითი ნორმის განსაზღვრა წარმოადგენს.

გარდა ზემოაღნიშნულისა, საგულისხმოა, რომ წარმოდგენილი კანონპროექტი, შეზღუდული შესაძლებლობის მქონე პირთა ან სხვა მოწყვლადი ჯგუფების (მათ შორის, ნაკლებად წარმოდგენილი სქესის) სოციალური და პროფესიული ინტეგრაციის უზრუნველსაყოფად, ითვალისწინებს მნიშვნელოვან სიახლეს სახელმწიფო შესყიდვების დარეზერვების მექანიზმის დანერგვის სახით. აღნიშნული ინსტრუმენტი წარმოადგენს ინკლუზიური საჯარო პოლიტიკის მნიშვნელოვან კომპონენტს და მიზნად ისახავს ეკონომიკურ აქტივობებში მოწყვლადი ჯგუფების მონაწილეობის გაფართოებას. კანონპროექტის თანახმად, სახელმწიფო შესყიდვის პროცედურა შესაძლებელია დარეზერვდეს იმ მიმწოდებელთათვის, რომლებიც აკმაყოფილებენ კანონით განსაზღვრულ სპეციფიკურ კრიტერიუმებს, რაც უზრუნველყოფს მიზნობრივი ჯგუფების რეალურ ჩართულობასა და მათი კონკურენტუნარიანობის ზრდას. აღნიშნული მიდგომა, ერთი მხრივ, ხელს უწყობს

თანასწორი შესაძლებლობების პრინციპის განმტკიცებას, ხოლო მეორე მხრივ, ქმნის დამატებით ეკონომიკური სტიმულირების მექანიზმს სოციალური პასუხისმგებლობის მექანიზმს სუბიექტებისთვის. ამასთანავე, კანონპროექტი განსაზღვრავს, რომ დარეზერვების მექანიზმის გამოყენება არ წარმოადგენს ზოგად წესს და იგი დაიშვება მხოლოდ იმ სფეროებში, რომლებიც განისაზღვრება საქართველოს მთავრობის შესაბამისი სამართლებრივი აქტით.

საგულისხმოა, რომ საკანონმდებლო ინიციატივის ერთ-ერთი მთავარი მიზანია სახელმწიფო შესყიდვებში ფასთა ინდექსაციასთან დაკავშირებული საკითხების დანერგვა. ცვლილება განპირობებულია თანამედროვე გამოწვევებით, განსაკუთრებით ფასთა ცვალებადობით, რაც მხარეებს აძლევს უფრო ოპერატიულად და ეფექტიანად მოახდინონ რეაგირება. აღსანიშნავია, რომ ხელშეკრულების ცვლილება განხორციელდება მთავრობის სამართლებრივი აქტის შესაბამისად, რაც გამორიცხავს თვითნებურ გადაწყვეტილებებს და ადგენს მკაფიო წესებს.

წარმოდგენილი პროექტით აგრეთვე იცვლება გამარტივებული შესყიდვის მიმართ დღეს არსებული მიდგომა და გამარტივებული შესყიდვა შესაძლებელია გამოყენებულ იქნეს საზღვარგარეთ საქართველოს თავდაცვისა და შინაგან საქმეთა სამინისტროების, საქართველოს სახელმწიფო უსაფრთხოების სამსახურის სისტემისა და საქართველოს პროკურატურის წარმომადგენლებისთვის, აგრეთვე თავდაცვის ატაშესთვის 50 000 ლარამდე ღირებულების (ყოველი კონკრეტული შესყიდვისათვის) საქონლის, მომსახურების ან სამუშაოს სახელმწიფო შესყიდვის შემთხვევაში.

ამავდროულად, აღსანიშნავია, რომ წარმოდგენილი კანონპროექტი, ზემოაღნიშნული ცვლილებების ეფექტიანი და სრულყოფილი იმპლემენტაციის უზრუნველსაყოფად, ითვალისწინებს გარკვეულ ტერმინოლოგიურ ცვლილებებს. აღნიშნული ცვლილებები მიზნად ისახავს კანონმდებლობის სისტემურ თანმიმდევრულობას და ერთგვაროვან ინტერპრეტაციას. ამ კონტექსტში, განსაკუთრებით მნიშვნელოვანია ახალი ტერმინის — „ეკონომიკური ოპერატორის“ — ცნების შემოღება, რომელიც განზოგადებულად მოიცავს სახელმწიფო შესყიდვებში მონაწილე ყველა შესაძლო სუბიექტს, მათ შორის როგორც მიმწოდებლებს, ასევე პრეტენდენტებსა და ქვეკონტრაქტორებს. აღნიშნული ტერმინი უზრუნველყოფს სამართლებრივი რეგულირების უფრო მოქნილ და ყოვლისმომცველ ჩარჩოს, ამცირებს ტერმინოლოგიურ ფრაგმენტაციას და ხელს უწყობს სამართლებრივი ნორმების ერთგვაროვან გამოყენებას პრაქტიკაში. ამასთანავე, „ეკონომიკური ოპერატორის“ ცნების დანერგვა შეესაბამება თანამედროვე საერთაშორისო სტანდარტებს, რაც მნიშვნელოვანია საქართველოს სახელმწიფო შესყიდვების სისტემის ჰარმონიზაციისა და შემდგომი ინსტიტუციური განვითარების თვალსაზრისით.

ა.ა.ბ) არსებული პრობლემის გადასაჭრელად კანონის მიღების აუცილებლობა:

ვინაიდან „სახელმწიფო შესყიდვების შესახებ“ საქართველოს კანონი წარმოადგენს სახელმწიფო შესყიდვების სისტემის ფუნქციონირების განმსაზღვრელ ძირითად ნორმატიულ აქტს და აყალიბებს შესაბამისი სამართლებრივი რეგულირების ფუნდამენტურ ჩარჩოს, მათ შორის, განსაზღვრავს მისი მოქმედების სფეროდან გამონაკლისებს, არაკეთილსინდისიერ პირთა რეესტრის („შავი სიის“) ცნებასა და სამართლებრივ ბუნებას, გამარტივებული შესყიდვის საფუძვლებს, სახელმწიფო შესყიდვის განხორციელების პროცედურებს, რომელთა

ფარგლებში ინტეგრირებულად უნდა იქნეს გამოყენებული კანონპროექტით გათვალისწინებული სახელმწიფო შესყიდვის ინსტრუმენტები და დარეზერვების მექანიზმი, აგრეთვე ადგენს ხელშეკრულებაში ცვლილების შეტანის საფუძვლებს, შემსყიდველი ორგანიზაციების უფლებამოსილებებსა და ვალდებულებებს სახელმწიფო შესყიდვებში მონაწილე პირთა შეფასების პროცესში და არეგულირებს აღნიშნულ სფეროსთან დაკავშირებულ სხვა არსებით საკითხებს, აღნიშნულ საკითხებთან დაკავშირებული ნებისმიერი არსებითი ცვლილების განხორციელება ან ახალი რეგულაციების დანერგვა შესაძლებელია მხოლოდ ამავე კანონში შესაბამისი ცვლილებების შეტანის გზით. ამდენად, წარმოდგენილი კანონპროექტი წარმოადგენს იმ აუცილებელ სამართლებრივ ინსტრუმენტს, რომლის მეშვეობითაც უზრუნველყოფილი იქნება როგორც კანონის მოქმედების სფეროდან ახალი, მიზნობრივი გამონაკლისების/გამარტივებული შესყიდვის საფუძვლის შემოღება, ისე „შავი სიის“ ცნების ცვლილება, სახელმწიფო შესყიდვების ინსტრუმენტების დანერგვა, ხელშეკრულებაში ცვლილების შეტანის საკითხის ახლებური მოწესრიგება, დარეზერვების მექანიზმის სამართლებრივი ფორმალიზება და ქვეკონტრაქტორებთან დაკავშირებული ახალი ნორმების სისტემური ინტეგრაცია.

ა.ბ) კანონპროექტის მოსალოდნელი შედეგები:

კანონპროექტის მიღება მნიშვნელოვნად განაახლებს და გააუმჯობესებს სახელმწიფო შესყიდვების ამჟამად არსებულ სამართლებრივ ჩარჩოს, რაც დადებით გავლენას მოახდენს როგორც შესყიდვების მარეგლამენტირებელ სამართლებრივ, ისე ეკონომიკურ გარემოზე, აგრეთვე კერძო სექტორის ჩართულობის გაღრმავებაზე. ამასთან, ახალი რეგულაციები შექმნის გამჭვირვალე, კონკურენტულ და ეფექტიან სისტემას, რაც უზრუნველყოფს სახელმწიფო ბიუჯეტის მიზნობრივ და რაციონალურ ხარჯვას.

საგულისხმოა, რომ ახალი ინსტრუმენტების – ელექტრონული კატალოგისა და ჩარჩოშეთანხმებების დანერგვა ხელს შეუწყობს უფრო მოქნილი და ეფექტიანი შესყიდვების განხორციელებას, რაც მნიშვნელოვნად შეამცირებს ადმინისტრაციულ დანახარჯებსა და ბიუროკრატიულ ბარიერებს. ჩარჩოშეთანხმების გამოყენებით შემსყიდველი ორგანიზაციები და ეკონომიკური ოპერატორები შეძლებენ როგორც ადამიანური, ისე ფინანსური რესურსების დაზოგვას და მათ ეფექტიან გამოყენებას.

გარდა ზემოაღნიშნულისა, კანონპროექტის მიღებით დადგინდება ქვეკონტრაქტორებთან დაკავშირებული სამართლებრივი ურთიერთობების გამჭვირვალე და პროგნოზირებადი წესები, მათ შორის განისაზღვრება ქვეკონტრაქტორების შერჩევის, პასუხისმგებლობის განაწილებისა და კონტროლის მექანიზმები. აღნიშნულის შედეგად, მოსალოდნელია, რომ გაიზრდება როგორც მცირე და საშუალო ბიზნესის ეკონომიკური შესაძლებლობები, ისე მთლიანად სახელმწიფო შესყიდვების სისტემის ეფექტიანობა.

ამავდროულად, კანონპროექტის მიღების შედეგად დადგინდება კანონის მოქმედების სფეროდან დამატებითი გამონაკლისები, რაც უზრუნველყოფს შესყიდვების განხორციელების პროცესში შემსყიდველი ორგანიზაციების მოქნილობის გაზრდას. ამასთან, ახლებურად განისაზღვრება შავი სიის ცნება, შავ სიაში რეგისტრაციის დიფერენცირებული ვადების დაწესებით კი ინერგება პროპორციულობისა და თანაზომიერების პრინციპი ჩადენილი

ქმედების სიმძიმის გათვალისწინებით. აღნიშნული, ერთი მხრივ, ხელს შეუწყობს კეთილსინდისიერი კონკურენციის გარემოს განმტკიცებას, ხოლო მეორე მხრივ, შეამცირებს სისტემაში არაკეთილსინდისიერი მონაწილეების ჩართულობის რისკებს.

გარდა ამისა, კანონპროექტის მიღებით სახელმწიფო შესყიდვების სისტემაში დამკვიდრდება უფრო მკაცრი ფილტრი იმ ეკონომიკური ოპერატორების მიმართ, რომლებიც დაკავშირებული არიან კანონპროექტით განსაზღვრული კატეგორიის დანაშაულებებთან, რაც პრაქტიკაში გამორიცხავს ასეთი სუბიექტების მონაწილეობას მაღალი ღირებულების შესყიდვებში (თუ შესასყიდი საქონლის, მომსახურების ან სამუშაოს სავარაუდო ღირებულება შეადგენს ან აღემატება კანონქვემდებარე აქტით დადგენილ ზღვარს). საგულისხმოა, რომ მოქმედი კანონმდებლობითაც შემსყიდველი ორგანიზაცია უფლებამოსილია, კანონქვემდებარე ნორმატიული აქტით დადგენილი წესით, მოახდინოს პრეტენდენტის დისკვალიფიკაცია პროექტით წარმოდგენილ შემთხვევებში, თუმცა ცვლილების შედეგად მძიმე და განსაკუთრებით მძიმე, ასევე მაღალი საზოგადოებრივი საფრთხის მქონე დანაშაულებთან მიმართებით დამატებითი აქცენტი გაკეთდება და შემსყიდველი ორგანიზაციებისათვის უფრო მკაფიო მითითებითი ნორმის განისაზღვრება.

ამასთან, საგულისხმოა, რომ წარმოდგენილი კანონპროექტის მიღების შედეგად შეიქმნება მნიშვნელოვანი ქმედითი ბერკეტი შეზღუდული შესაძლებლობის მქონე პირთა ან სხვა მოწყვლადი ჯგუფების (მათ შორის, ნაკლებად წარმოდგენილი სქესის) სოციალური და პროფესიული ინტეგრაციის უზრუნველსაყოფად.

ამავდროულად, კანონპროექტის მიღების შედეგად მოწესრიგდება სახელმწიფო შესყიდვებში ფასთა ინდექსაციასთან დაკავშირებული საკითხები. აღსანიშნავია, რომ ხელშეკრულების ცვლილება განხორციელდება მთავრობის სამართლებრივი აქტის შესაბამისად, რაც გამორიცხავს თვითნებურ გადაწყვეტილებებს და დაადგენს მკაფიო წესებს.

წარმოდგენილი პროექტით აგრეთვე შეიცვლება გამარტივებული შესყიდვის მიმართ დღეს არსებული მიდგომა და გამარტივებული შესყიდვა გამოყენებულ იქნება საზღვარგარეთ საქართველოს თავდაცვისა და შინაგან საქმეთა სამინისტროების, საქართველოს სახელმწიფო უსაფრთხოების სამსახურის სისტემისა და საქართველოს პროკურატურის წარმომადგენლებისთვის, აგრეთვე თავდაცვის ატაშესთვის 50 000 ლარამდე ღირებულების (ყოველი კონკრეტული შესყიდვისათვის) საქონლის, მომსახურების ან სამუშაოს სახელმწიფო შესყიდვის შემთხვევაშიც.

ამდენად, წარმოდგენილი ცვლილება უზრუნველყოფს შემსყიდველი ორგანიზაციებისათვის კანონით დაკისრებული უფლებამოსილების დროულად და შეუფერხებლად განხორციელებას, სახელმწიფო მმართველობის სისტემის რეფორმის გაგრძელებას, სახელმწიფოს ფინანსური რესურსების მიზნობრივ გამოყენებას, კორუფციული რისკების შემცირებას გამჭვირვალობის ზრდის გზით, კონკურენტული გარემოს გაძლიერებას, მცირე და საშუალო ბიზნესის სახელმწიფო შესყიდვებში მონაწილეობის წახალისებას, მთლიანობაში კი - იმ სამართლებრივი გარემოს შექმნას, რომელიც სრულად შეესაბამება საერთაშორისო საუკეთესო პრაქტიკას.

ა.გ) კანონპროექტის ძირითადი არსი:

კანონპროექტი ითვალისწინებს ისეთი სამართლებრივი ჩარჩოს შექმნას, რომელიც უზრუნველყოფს სახელმწიფო შესყიდვების ეფექტიან, გამჭვირვალე, კონკურენტულ და მოქნილ გარემოში განხორციელებას, სახელმწიფო რესურსების მიზნობრივად გამოყენების პრინციპების დაცვით. კერძოდ, წარმოდგენილი კანონპროექტით გათვალისწინებულია სახელმწიფო შესყიდვების ინსტრუმენტები, რაც, თავისი არსით, გულისხმობს დამატებით საშუალებებს, რომელთა მიხედვითაც შესაძლებელია წარიმართოს სახელმწიფო შესყიდვები. წინამდებარე კანონპროექტით წარმოდგენილია სახელმწიფო შესყიდვის შემდეგი ინსტრუმენტები: ჩარჩოშეთანხმება და ელექტრონული კატალოგი. აღნიშნული ინსტრუმენტების გამოყენებით შესყიდვის განხორციელებისას შემსყიდველი ორგანიზაციები და ეკონომიკური ოპერატორები შეძლებენ როგორც ადამიანური, ისე ფინანსური რესურსების დაზოგვას და მათ ეფექტიან გამოყენებას.

ამავდროულად, აღსანიშნავია, რომ წარმოდგენილი კანონპროექტი განსაკუთრებულ ყურადღებას ამახვილებს მცირე და საშუალო ბიზნესის განვითარების ხელშეწყობაზე, რაც გამოიხატება ქვეკონტრაქტორის ცნების ინსტიტუციურ დანერგვასა და მისი გამოყენების სამართლებრივი ჩარჩოს დეტალურ რეგულირებაში. ამასთანავე, კანონპროექტი ითვალისწინებს ქვეკონტრაქტორებთან დაკავშირებული სამართლებრივი ურთიერთობების გამჭვირვალე და პროგნოზირებადი წესების ჩამოყალიბებას, მათ შორის, ქვეკონტრაქტორების შერჩევის, ჩართულობის ფარგლების, პასუხისმგებლობის განაწილებისა და კონტროლის მექანიზმების მკაფიო განსაზღვრას. აღნიშნული რეგულაციები უზრუნველყოფს, რომ ქვეკონტრაქტორების ჩართულობა განხორციელდეს კეთილსინდისიერების, თანასწორობისა და არადისკრიმინაციული მიდგომების საფუძველზე, რაც, თავის მხრივ, ზრდის როგორც მცირე და საშუალო ბიზნესის ეკონომიკურ შესაძლებლობებს, ისე მთლიანად სახელმწიფო შესყიდვების სისტემის ეფექტიანობას.

გარდა ზემოაღნიშნულისა, კანონპროექტით დგინდება დამატებითი გამონაკლისები კანონის მოქმედების სფეროდან. აღსანიშნავია, რომ კანონპროექტით გათვალისწინებულ გამონაკლისებთან დაკავშირებული შესყიდვების სახელმწიფო შესყიდვების მარეგულირებელი კანონმდებლობის სრული დაცვით განხორციელება, დღეის მდგომარეობით, შემსყიდველი ორგანიზაციებისთვის გარკვეულ პრაქტიკულ დაბრკოლებებს წარმოშობს. მაგალითად, უმაღლესი საგანმანათლებლო დაწესებულებების მიერ არარეზიდენტი დაწესებულებებისა და საერთაშორისო ორგანიზაციებისგან საერთაშორისო აკრედიტაციის, ავტორიზაციის ან გარე შეფასების მოპოვების მიზნით მომსახურების შესყიდვა, აგრეთვე საერთაშორისო ორგანიზაციებში გაწევრიანებასთან და საერთაშორისო ღონისძიებებში მონაწილეობის საწევრო ან სარეგისტრაციო გადასახადების გადახდასთან დაკავშირებული ოპერაციები, ასევე შემსყიდველი ორგანიზაციის მიერ სხვა შემსყიდველი ორგანიზაციისგან იმ ექსკლუზიური მომსახურების შესყიდვა, რომლის გაწევის უფლებაც სხვა შემსყიდველ ორგანიზაციას კანონით ან კანონის შესაბამისად მიენიჭა, თავისი შინაარსით წარმოადგენს იმგვარ ურთიერთობებს, რომლებიც რთულად ექვემდებარება კონკურენტული სატენდერო პროცედურების სტანდარტულ მოდელს. კერძოდ, ასეთ შემთხვევებში მომსახურების მიმწოდებელი, როგორც წესი, წინასწარ განსაზღვრულია და დაკავშირებულია კონკრეტულ საერთაშორისო ინსტიტუციასთან, აკრედიტაციის გამცემ ორგანოსთან ან

წარმოადგენს კანონმდებლობით განსაზღვრულ პირს, რაც გამორიცხავს ალტერნატიული მომწოდებლების არსებობასა და კონკურენციის უზრუნველყოფის შესაძლებლობას. შესაბამისად, აღნიშნული ტიპის შესყიდვებზე მოქმედი სტანდარტული პროცედურების გავრცელება იწვევს პროცესის გაუმართლებელ გაჭიანურებას, ადმინისტრაციული რესურსების არაეფექტიან გამოყენებასა და ზოგ შემთხვევაში – საერთაშორისო ვალდებულებების დროულად შესრულების შეფერხებას. ამ გარემოებების გათვალისწინებით, კანონპროექტი ითვალისწინებს შესაბამისი გამონაკლისების დაწესებას, რაც უზრუნველყოფს შემსყიდველი ორგანიზაციების ოპერატიულობასა და ფუნქციურ ეფექტიანობას.

ამასთან, საგულისხმოა, რომ წარმოდგენილი კანონპროექტით ახლებურად ყალიბდება შესყიდვებში მონაწილე არაკეთილსინდისიერ პირთა რეესტრის („შავი სიის“) ცნება, რაც დაკავშირებულია ერთი მხრივ ახალი სახელმწიფო შესყიდვის ინსტრუმენტის, ჩარჩო შეთანხმების კანონმდებლობაში ინტეგრაციასთან და მეორე მხრივ, შავ სიაში რეგისტრაციის ვადის ახლებურად განსაზღვრასთან, კერძოდ, წარმოდგენილი კანონპროექტი ითვალისწინებს, რომ ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენის შემთხვევაში შესაძლებელი იქნება მიმწოდებლის შავ სიაში რეგისტრაცია ორი წლის ვადით, რაც წარმოადგენს შედარებით მკაცრ, თუმცა მიზნობრივად დასაბუთებულ ღონისძიებას.

ამავდროულად, წარმოდგენილი კანონპროექტით შემსყიდველი ორგანიზაცია უფლებამოსილი იქნება არ დაუშვას იმ პირების მონაწილეობა სახელმწიფო შესყიდვებში, რომლებიც დაკავშირებული არიან კანონპროექტით განსაზღვრული კატეგორიის დანაშაულებებთან, იმ სახელმწიფო შესყიდვებში, რომელთა სავარაუდო ღირებულება შეადგენს ან აღემატება კანონქვემდებარე აქტით დადგენილ ზღვარს.

გარდა ზემოაღნიშნულისა, საგულისხმოა, რომ წარმოდგენილი კანონპროექტი, შეზღუდული შესაძლებლობის მქონე პირთა ან სხვა მოწყვლადი ჯგუფების (მათ შორის, ნაკლებად წარმოდგენილი სქესის) სოციალური და პროფესიული ინტეგრაციის უზრუნველსაყოფად, ითვალისწინებს მნიშვნელოვან სიახლეს სახელმწიფო შესყიდვების დარეზერვების მექანიზმის დანერგვის სახით. აღნიშნული ინსტრუმენტი წარმოადგენს ინკლუზიური საჯარო პოლიტიკის მნიშვნელოვან კომპონენტს და მიზნად ისახავს ეკონომიკურ აქტივობებში მოწყვლადი ჯგუფების მონაწილეობის გაფართოებას. კანონპროექტის თანახმად, სახელმწიფო შესყიდვის პროცედურა შესაძლებელია დარეზერვდეს იმ მიმწოდებელთათვის, რომლებიც აკმაყოფილებენ კანონით განსაზღვრულ სპეციფიკურ კრიტერიუმებს, რაც უზრუნველყოფს მიზნობრივი ჯგუფების რეალურ ჩართულობასა და მათი კონკურენტუნარიანობის ზრდას. ამასთანავე, კანონპროექტი განსაზღვრავს, რომ დარეზერვების მექანიზმის გამოყენება არ წარმოადგენს ზოგად წესს და იგი დაიშვება მხოლოდ იმ სფეროებში, რომლებიც განისაზღვრება საქართველოს მთავრობის შესაბამისი სამართლებრივი აქტით.

საგულისხმოა, რომ საკანონმდებლო ინიციატივით წესრიგდება სახელმწიფო შესყიდვებში ფასთა ინდექსაციასთან დაკავშირებული საკითხები. ამასთან, ხელშეკრულების ცვლილება განხორციელდება მთავრობის სამართლებრივი აქტის შესაბამისად.

წარმოდგენილი პროექტით აგრეთვე იცვლება გამარტივებული შესყიდვის მიმართ დღეს არსებული მიდგომა და გამარტივებული შესყიდვა შესაძლებელია გამოყენებულ იქნეს საზღვარგარეთ საქართველოს თავდაცვისა და შინაგან საქმეთა სამინისტროების, საქართველოს სახელმწიფო უსაფრთხოების სამსახურის სისტემისა და საქართველოს პროკურატურის წარმომადგენლებისთვის, აგრეთვე თავდაცვის ატაშესთვის 50 000 ლარამდე ღირებულების (ყოველი კონკრეტული შესყიდვისათვის) საქონლის, მომსახურების ან სამუშაოს სახელმწიფო შესყიდვის შემთხვევაში.

ამავდროულად, აღსანიშნავია, რომ წარმოდგენილი კანონპროექტი, ზემოაღნიშნული ცვლილებების ეფექტიანი და სრულყოფილი იმპლემენტაციის უზრუნველსაყოფად, ითვალისწინებს ტერმინოლოგიურ ცვლილებებს. ამ კონტექსტში, განსაკუთრებით მნიშვნელოვანია ახალი ტერმინის — „ეკონომიკური ოპერატორის“ — ცნების შემოღება, რომელიც განზოგადებულად მოიცავს სახელმწიფო შესყიდვებში მონაწილე ყველა შესაძლო სუბიექტს, მათ შორის როგორც მიმწოდებლებს, ასევე პრეტენდენტებსა და ქვეკონტრაქტორებს. ამასთანავე, „ეკონომიკური ოპერატორის“ ცნების დანერგვა შეესაბამება თანამედროვე საერთაშორისო სტანდარტებს, რაც მნიშვნელოვანია საქართველოს სახელმწიფო შესყიდვების სისტემის ჰარმონიზაციისა და შემდგომი ინსტიტუციური განვითარების თვალსაზრისით.

ყოველივე ზემოაღნიშნულის გათვალისწინებით, საგულისხმოა, რომ წარმოდგენილი კანონპროექტი აყალიბებს სახელმწიფო შესყიდვების სამართლებრივ ჩარჩოს, რომელიც დაფუძნებულია კონკურენციის, გამჭვირვალობის, პროპორციულობისა და თანასწორობის პრინციპებზე. მასში წარმოდგენილი დებულებების კანონმდებლობაში იმპლემენტაცია უზრუნველყოფს შემსყიდველი ორგანიზაციების, ეკონომიკური ოპერატორებისა და საზოგადოების ინტერესების დაბალანსებას, აუმჯობესებს ფინანსური რესურსების მართვის ხარისხს და ამაღლებს ნდობას სახელმწიფო შესყიდვების სისტემისადმი.

ა.დ) კანონპროექტის კავშირი სამთავრობო პროგრამასთან და შესაბამის სფეროში არსებულ სამოქმედო გეგმასთან, ასეთის არსებობის შემთხვევაში (საქართველოს მთავრობის მიერ ინიცირებული კანონპროექტის შემთხვევაში):

ასეთი არ არსებობს.

ა.ე) კანონპროექტის ძალაში შესვლის თარიღის შერჩევის პრინციპი, ხოლო კანონისთვის უკუძალის მინიჭების შემთხვევაში – აღნიშნულის თაობაზე შესაბამისი დასაბუთება:

კანონპროექტის ძალაში შესვლის თარიღი შერჩეულია ისე, რომ უზრუნველყოფილი იყოს როგორც სამართლებრივი, ისე ინსტიტუციური და ტექნოლოგიური მზადყოფნა ახალი რეგულაციების ეფექტიანად განხორციელებისათვის. წარმოდგენილი კანონპროექტით გათვალისწინებული ცვლილებების მოცულობა და სისტემურობა მოითხოვს შესაბამის ნორმატიულ, ადმინისტრაციულ და ტექნოლოგიურ ცვლილებებს. სწორედ ამიტომ, კანონპროექტის კონკრეტული დებულებების ამოქმედება გათვალისწინებულია ეტაპობრივად, გარდამავალი ვადების განსაზღვრის გზით, კერძოდ:

კანონპროექტის პირველი მუხლის პირველი პუნქტის „ბ“ ქვეპუნქტი, მე-2 პუნქტის „ა“, „დ“, „ე“ და „ზ“ ქვეპუნქტები, მე-3 პუნქტის „ა.ა.“, „ა.გ“, „ა.დ“ და „ბ.ა“-„ბ.გ“ ქვეპუნქტები, მე-4 პუნქტის „ა“ ქვეპუნქტი, მე-5, მე-6, მე-10-მე-12, მე-14 და მე-15 პუნქტები, მე-16 პუნქტის „ა“, „გ“, „ე“ და „ვ“ ქვეპუნქტები, მე-17, მე-19 და მე-20 პუნქტები ამოქმედდება 2027 წლის 1 იანვრიდან. ამდენად, შავ სიასთან, ჩარჩოშეთანხმებასა და ელექტრონული კატალოგთან დაკავშირებული დებულებები ამოქმედდება სწორედ აღნიშნული თარიღიდან, ვინაიდან შავ სიასთან დაკავშირებული ცვლილებების, ასევე აღნიშნული ინსტრუმენტების იმპლემენტაციისათვის აუცილებელია შესაბამისი ელექტრონული პლატფორმების, ტექნიკური ინფრასტრუქტურისა და ადმინისტრაციული რესურსების მომზადება, აგრეთვე შესაბამისი ცვლილების განხორციელება კანონქვემდებარე ნორმატიულ აქტებში და აღნიშნული საკითხების მარეგულირებელი ახალი ნორმატიული აქტების მიღება/გამოცემა.

კანონპროექტის პირველი მუხლის მე-2 პუნქტის „ბ“ და „გ“ ქვეპუნქტები, მე-3 პუნქტის „ა.ბ“ და „გ“ ქვეპუნქტები, მე-4 პუნქტის „ბ“ ქვეპუნქტი, მე-8, მე-9, მე-13 და მე-18 პუნქტები ამოქმედდება 2026 წლის 1 სექტემბრიდან, ვინაიდან, აღნიშნულ ვადამდე საჭიროა, ქვეკონტრაქტორებთან და დისკვალიფიკაციასთან დაკავშირებული შესაბამისი ცვლილებების განხორციელება სახელმწიფო შესყიდვების მარეგულირებელ კანონქვემდებარე ნორმატიულ აქტებსა და სახელმწიფო შესყიდვების ერთიან ელექტრონულ სისტემაში.

რაც შეეხება კანონის მე-7 პუნქტს, მისი ამოქმედების თარიღად გათვალისწინებულია კანონის გამოქვეყნებიდან 90-ე დღე. აღნიშნული ვადა საჭიროა დარეზერვებასთან დაკავშირებული შესაბამისი ცვლილებების განსახორციელებლად სახელმწიფო შესყიდვების მარეგულირებელ კანონქვემდებარე ნორმატიულ აქტებსა და სახელმწიფო შესყიდვების ერთიან ელექტრონულ სისტემაში.

ამასთან, კანონპროექტის პირველი მუხლის პირველი პუნქტის „ა.ა“ ქვეპუნქტის, მე-2 პუნქტის „ვ“ ქვეპუნქტისა და მე-16 პუნქტის „ბ“ და „დ“ ქვეპუნქტების ამოქმედების თარიღად გათვალისწინებულია კანონის გამოქვეყნებიდან 30-ე დღე, ვინაიდან, აღნიშნულ ვადამდე საჭიროა, ამ პუნქტებთან დაკავშირებული შესაბამისი ცვლილებების განხორციელება სახელმწიფო შესყიდვების მარეგულირებელ კანონქვემდებარე ნორმატიულ აქტებსა და სახელმწიფო შესყიდვების ერთიან ელექტრონულ სისტემაში.

გარდა ზემოაღნიშნულისა, საგულისხმოა, რომ ფასთა ინდექსაციასთან დაკავშირებული ცვლილების, კერძოდ, კანონპროექტის პირველი მუხლის 21-ე პუნქტის ამოქმედების თარიღად გათვალისწინებულია 2026 წლის 1 ივნისი, ვინაიდან საკითხის მნიშვნელობის გამო, მიზანშეწონილია მისი დროულად ამოქმედება.

კანონპროექტის სხვა დებულებები ამოქმედდება გამოქვეყნებისთანავე, ვინაიდან, მათი ამოქმედებისათვის დამატებითი პირობები ან ვადები არ არის საჭირო და მნიშვნელოვანია მათი დროული ამოქმედება. ამასთან, კანონპროექტი არ ითვალისწინებს კანონისთვის უკუძალის მინიჭებას.

ა.ვ) კანონპროექტის დაჩქარებული წესით განხილვის მიზეზები და შესაბამისი დასაბუთება (თუ ინიციატორი ითხოვს კანონპროექტის დაჩქარებული წესით განხილვას):

მოთხოვნილია კანონპროექტის დაჩქარებული წესით განხილვა შემდეგ გარემოებათა გამო:

წარმოდგენილი კანონპროექტის დაჩქარებული წესით განხილვის აუცილებლობა განპირობებულია იმით, რომ იგი ითვალისწინებს სახელმწიფო შესყიდვების სისტემის ეფექტიანობისა და გამჭვირვალობის მნიშვნელოვნად გაუმჯობესებას, რაც პირდაპირ კავშირშია საჯარო ფინანსების მართვის ხარისხთან. წარმოდგენილი ცვლილებები ქმნის დამატებით სამართლებრივ ინსტრუმენტებს (ჩარჩოშეთანხმება, ელექტრონული კატალოგი), რომელთა დროული ამოქმედება საშუალებას მისცემს შემსყიდველ ორგანიზაციებს ოპერატიულად და ეფექტიანად განახორციელონ შესყიდვები და თავიდან აიცილონ რესურსების არაეფექტიანი ხარჯვა.

ამასთანავე, კანონპროექტი შეიცავს მნიშვნელოვან ანტიკორუფციულ მექანიზმებს, მათ შორის კონკრეტულ დანაშაულებებთან (მაგ: კორუფციული შინაარსის დანაშაულები, თაღლითობა, ფულის გათეთრება, ტერორიზმი, ტრეფიკინგი და სხვა დანაშაულები) დაკავშირებული პირების დისკვალიფიკაციის შესაძლებლობას, რაც განსაკუთრებით აქტუალურია მაღალი ღირებულების სახელმწიფო შესყიდვებში. კერძოდ, შემსყიდველი ორგანიზაცია უფლებამოსილი იქნება არ დაუშვას ასეთი პირების მონაწილეობა იმ სახელმწიფო შესყიდვებში, რომელთა სავარაუდო ღირებულება შეადგენს ან აღემატება კანონქვემდებარე აქტით დადგენილ ზღვარს.

დამატებით, კანონპროექტი, ქვეკონტრაქტორის ინსტიტუტის სამართლებრივი რეგულირების გზით, ხელს უწყობს მცირე და საშუალო ბიზნესის მხარდაჭერას, რაც, მათი ჩართულობისთვის, ქმნის მკაფიო და პროგნოზირებად წესებს სახელმწიფო შესყიდვებში. შედეგად, მცირე და საშუალო ბიზნესს ეძლევა შესაძლებლობა, მონაწილეობა მიიღოს მსხვილ პროექტებში, როგორც ქვეკონტრაქტორმა, ხოლო მათი უფლებებისა და მოვალეობების განსაზღვრა ამცირებს სამართლებრივ გაურკვევლობებს და ზრდის ნდობას პროცესის მონაწილეებს შორის. აღნიშნული ცვლილებების დროული ამოქმედება მნიშვნელოვანია ეკონომიკური აქტივობის სტიმულირების, კონკურენციის გაძლიერებისა და მცირე და საშუალო ბიზნესის ეკონომიკური შესაძლებლობების ზრდისთვის.

ყოველივე ზემოაღნიშნულის შესაბამისად, წარმოდგენილი კანონპროექტის დაჩქარებული წესით განხილვა უზრუნველყოფს კანონპროექტით დასახული, ზემოაღნიშნული მიზნების დროულ მიღწევასა და სისტემური რეფორმების ეფექტიან განხორციელებას.

ბ) კანონპროექტის ფინანსური გავლენის შეფასება საშუალოვადიან პერიოდში (კანონპროექტის ამოქმედების წელი და შემდგომი 3 წელი):

ბ.ა) კანონპროექტის მიღებასთან დაკავშირებით აუცილებელი ხარჯების დაფინანსების წყარო:

წარმოდგენილ კანონპროექტთან დაკავშირებული ხარჯები არ მოითხოვს დამატებით საბიუჯეტო დაფინანსებას (აღნიშნული ხარჯები უკავშირდება ძირითადად

ადმინისტრაციული და ტექნიკური ინფრასტრუქტურის მოდერნიზებას, საკანონმდებლო რეგულაციებთან შესაბამისობაში მოყვანას, ინფორმაციული სისტემების გაუმჯობესებასა და შესაბამისი პერსონალის გადამზადებას). ამ ხარჯების დაფარვა შესაძლებელი იქნება სახელმწიფო შესყიდვების სააგენტოსა და შესაბამისი შემსყიდველი ორგანიზაციების მოქმედი ბიუჯეტების ფარგლებში, რესურსების გადანაწილების გზით.

ბ.ბ) კანონპროექტის გავლენა სახელმწიფო, ავტონომიური რესპუბლიკის რესპუბლიკური ან/და მუნიციპალიტეტის ბიუჯეტის საშემოსავლო ნაწილზე:

საგულისხმოა, რომ წარმოდგენილი კანონის პროექტით წესდება კანონის მოქმედების სფეროდან დამატებითი გამონაკლისები, შესაბამისად, ცალკეული შემსყიდველი ორგანიზაციები აღარ იქნებიან ვალდებული გამოიყენონ „სახელმწიფო შესყიდვის შესახებ“ საქართველოს კანონით დადგენილი სახელმწიფო შესყიდვის ელექტრონული საშუალებები აღნიშნული მომსახურების შესყიდვისას და გამოაქვეყნონ სატენდერო/საკონკურსო განცხადება და სატენდერო/საკონკურსო დოკუმენტაცია. ამდენად, კანონპროექტს შესაძლოა გავლენა ჰქონდეს სახელმწიფო ბიუჯეტის საშემოსავლო ნაწილზე, აგრეთვე სააგენტოს საკუთარ შემოსავალზე, ვინაიდან შემსყიდველი ორგანიზაციები აღარ გადაიხდიან გამოქვეყნების საფასურს აღნიშნული მომსახურების შესყიდვისას (ამჟამად მოქმედი 100 ლარი), ხოლო ამ მომსახურების გაწევით დაინტერესებული სისტემაში რეგისტრირებული მიმწოდებლები – სატენდერო/საკონკურსო წინადადების წარდგენის საფასურს (ამჟამად მოქმედი 100 ლარი). საგულისხმოა, რომ სააგენტოს საკუთარი შემოსავლების ცვლილება პროპორციულად აისახება სახელმწიფო ბიუჯეტში გადარიცხ თანხაზე „სახელმწიფო ბიუჯეტის შესახებ“ საქართველოს კანონის შესაბამისად. ამასთან, გავლენის ოდენობა დამოკიდებულია შემსყიდველი ორგანიზაციების მიერ სხვა შემსყიდველი ორგანიზაციისგან იმ ექსკლუზიური მომსახურების შესყიდვის ოდენობაზე, რომლის გაწევის უფლებაც სხვა შემსყიდველ ორგანიზაციას კანონით ან კანონის შესაბამისად მიენიჭა, უმაღლესი საგანმანათლებლო დაწესებულების მიერ არარეზიდენტი დაწესებულებისგან/საერთაშორისო ორგანიზაციისგან საერთაშორისო აკრედიტაციის/ავტორიზაციის/გარე შეფასების მოპოვების მიზნით განსახორციელებელ მომსახურებაზე, აგრეთვე საერთაშორისო ორგანიზაციებში გაწევრებასა და საერთაშორისო ღონისძიებებში მონაწილეობის საწევრო/სარეგისტრაციო გადასახადების გადახდასთან დაკავშირებული შესყიდვების ოდენობაზე.

დამატებით, აღსანიშნავია, რომ კანონპროექტში წარმოდგენილი დებულებების იმპლემენტაცია ხელს შეუწყობს სახელმწიფო რესურსების უფრო მეტად მიზნობრივ განაწილებასა და მათ ეკონომიკურად გამართლებულ გამოყენებას, რაც საშუალოვადიან პერსპექტივაში გამოიწვევს ფინანსური მდგრადობის ზრდას სახელმწიფო შესყიდვების სფეროში. გარდა ამისა, მცირე და საშუალო ბიზნესის ჩართულობის გაზრდა, ასევე ინკლუზიურობის ხელშეწყობა სახელმწიფო შესყიდვებში დადებითად აისახება ეკონომიკურ აქტივობაზე და ბიუჯეტში შემოსავლების ზრდაზე, რაც შექმნის დამატებითი ეკონომიკური ზრდის ეფექტს.

გარდა ზემოაღნიშნულისა, საგულისხმოა, რომ ქვეკონტრაქტორებთან დაკავშირებული რეგულაციების გამჭვირვალობის გაზრდა და ერთიანი წესების დანერგვა ყველა

მიმწოდებელზე მოსალოდნელია, რომ გააუმჯობესებს კონკურენციის პირობებს და გააფართოებს ბაზარზე მცირე და საშუალო ბიზნესის მონაწილეობას, რაც, თავის მხრივ, დადებითად აისახება ეკონომიკურ აქტივობაზე. ეკონომიკური ოპერატორების ჩართულობის ზრდა და შესყიდვების პროცესებში მონაწილე სუბიექტთა გაფართოება ქმნის დამატებით წინაპირობებს საგადასახადო ბაზის ზრდისთვის, რაც პოტენციურად შეიძლება აისახოს სახელმწიფო ბიუჯეტის საშემოსავლო ნაწილზე, თუმცა აღნიშნული ეფექტი დამოკიდებულია ბიზნეს აქტივობის საერთო დინამიკასა და მაკროეკონომიკურ გარემოზე და წინასწარ რაოდენობრივად ზუსტად განსაზღვრადი არ არის.

ბ.გ) კანონპროექტის გავლენა სახელმწიფო, ავტონომიური რესპუბლიკის რესპუბლიკური ან/და მუნიციპალიტეტის ბიუჯეტის ხარჯვით ნაწილზე:

კანონპროექტის მიღება, მის ზოგიერთ ასპექტში, მოითხოვს ერთჯერადი ხასიათის გარკვეულ ხარჯებს მისი იმპლემენტაციის მოსამზადებელ და საწყის ეტაპებზე. აღნიშნული ხარჯები უკავშირდება ძირითადად ადმინისტრაციული და ტექნიკური ინფრასტრუქტურის მოდერნიზებას, საკანონმდებლო რეგულაციებთან შესაბამისობაში მოყვანას, ინფორმაციული სისტემების გაუმჯობესებასა და შესაბამისი პერსონალის გადამზადებას.

პირველ ეტაპზე (კანონის ამოქმედების წელი) მოსალოდნელია დანახარჯები, რომლებიც მიმართული იქნება:

1. სახელმწიფო შესყიდვების ერთიანი ელექტრონული სისტემის განახლებისკენ, რათა შესაძლებელი გახდეს ელექტრონული კატალოგისა და ჩარჩოშეთანხმების, აგრეთვე კანონპროექტით წარმოდგენილი სხვა სიახლეებთან (ქვეკონტრაქტორები, შავი სია, სახელმწიფო შესყიდვის დარეზერვება) დაკავშირებული დებულებების ინტეგრაცია;
2. ინფორმაციული და პროგრამული უზრუნველყოფის ტექნიკური გაძლიერებისკენ;
3. საკანონმდებლო ცვლილებების არსის ფართოდ კომუნიცირებისა და ცნობიერების ამაღლების კამპანიის განხორციელებისკენ.

აღნიშნული დანახარჯები, პროგნოზის მიხედვით, მოკლევადიან პერიოდში იქნება ერთჯერადი ხასიათის და არ მოითხოვს დამატებით საბიუჯეტო დაფინანსებას.

საშუალოვადიან პერიოდში (მომდევნო სამი წლის განმავლობაში) მოსალოდნელია ფინანსური დანახარჯების შემცირება და ეკონომიკური ეფექტის მიღწევა შემდეგი მიმართულებით:

1. ადმინისტრაციული ხარჯების შემცირება;
2. შესყიდვების კონკურენტული გარემოს გაფართოება, რაც გამოიწვევს შეთავაზებული ფასების შემცირებას და ბიუჯეტის რესურსების ოპტიმიზაციას;

3. შესყიდვების პროცესის გამჭვირვალობის ზრდა, რაც შეამცირებს ფინანსურ და კორუფციულ რისკებს;
4. გრძელვადიანი ეკონომიკური დანაზოგების მიღწევა, განსაკუთრებით ჩარჩოშეთანხმების მექანიზმის გამოყენების შედეგად.

კანონპროექტის მიღების შემდგომ, კანონპროექტით გათვალისწინებული სახელმწიფო შესყიდვების ინსტრუმენტების, აგრეთვე ქვეკონტრაქტორებთან, შავი სიასთან და სახელმწიფო შესყიდვის დარეზერვებასთან დაკავშირებული სიახლეების სახელმწიფო შესყიდვების ერთიან ელექტრონულ სისტემაში ინტეგრირებისათვის, საჭირო გახდება სისტემის მოდერნიზება, რისთვისაც აუცილებელი იქნება აღნიშნულის განხორციელებისათვის შესაბამისი ფინანსური თუ ადამიანური რესურსის გამოყოფა. კერძოდ, წარმოდგენილი კანონპროექტის თანახმად, სახელმწიფო შესყიდვების სააგენტო ვალდებულია უზრუნველყოს სახელმწიფო შესყიდვების ერთიანი ელექტრონული სისტემის წარმოდგენილ კანონპროექტთან და მის შესაბამისად მიღებული/გამოცემული კანონქვემდებარე ნორმატიული აქტის/აქტების მოთხოვნებთან შესაბამისობა, თუმცა ერთიანი ელექტრონული სისტემის მოდერნიზებისათვის საჭირო ფინანსური რესურსის ოდენობა დამოკიდებულია წარმოდგენილი კანონპროექტის შესაბამისად გამოცემული კანონქვემდებარე ნორმატიული აქტებით დადგენილ რეგულაციებსა და რეგულაციებით განსაზღვრული სიახლეების სისტემაში იმპლემენტაციის მასშტაბზე. აღნიშნული ხარჯები დაფინანსდება სახელმწიფო შესყიდვების სააგენტოს საკუთარი შემოსავლებიდან.

ამასთან, რამდენადაც წარმოდგენილი კანონის პროექტით წესდება კანონის მოქმედების სფეროდან დამატებითი გამონაკლისები, ცალკეული შემსყიდველი ორგანიზაციები აღარ იქნებიან ვალდებული გამოიყენონ „სახელმწიფო შესყიდვის შესახებ“ საქართველოს კანონით დადგენილი სახელმწიფო შესყიდვის ელექტრონული საშუალებები აღნიშნული მომსახურების შესყიდვისას, გამოაქვეყნონ სატენდერო/საკონკურსო განცხადება, აგრეთვე, სატენდერო/საკონკურსო დოკუმენტაცია და შესაბამისად, გადაიხადონ საფასური (ამჟამად არსებული 100 ლარი). ამდენად, წარმოდგენილი პროექტი ამ მიმართულებით გამოიწვევს სახელმწიფო, ავტონომიური რესპუბლიკის რესპუბლიკური ან/და მუნიციპალიტეტის ბიუჯეტის ხარჯვით ნაწილის დაზოგვას. ამასთან, გავლენის ოდენობა დამოკიდებულია შემსყიდველი ორგანიზაციების მიერ სხვა შემსყიდველი ორგანიზაციისგან იმ ექსკლუზიური მომსახურების შესყიდვის ოდენობაზე, რომლის გაწევს უფლებაც სხვა შემსყიდველ ორგანიზაციას კანონით ან კანონის შესაბამისად მიენიჭა, უმაღლესი საგანმანათლებლო დაწესებულების მიერ არარეზიდენტი დაწესებულებისგან/საერთაშორისო ორგანიზაციისგან საერთაშორისო აკრედიტაციის/ავტორიზაციის/გარე შეფასების მოპოვების მიზნით განსახორციელებელ მომსახურებაზე, აგრეთვე საერთაშორისო ორგანიზაციებში გაწევრებასა და საერთაშორისო ღონისძიებებში მონაწილეობის საწევრო/სარეგისტრაციო გადასახადების გადახდასთან დაკავშირებული შესყიდვების ოდენობაზე.

დამატებით, აღსანიშნავია, რომ წარმოდგენილი პროექტით აგრეთვე იცვლება გამარტივებული შესყიდვის მიმართ დღეს არსებული მიდგომა და გამარტივებული შესყიდვა შესაძლებელია გამოყენებულ იქნეს საზღვარგარეთ საქართველოს თავდაცვისა და შინაგან საქმეთა სამინისტროების, საქართველოს სახელმწიფო უსაფრთხოების სამსახურის სისტემისა

და საქართველოს პროკურატურის წარმომადგენლებისთვის, აგრეთვე თავდაცვის ატაშესთვის 50 000 ლარამდე ღირებულების (ყოველი კონკრეტული შესყიდვისათვის) საქონლის, მომსახურების ან სამუშაოს სახელმწიფო შესყიდვის შემთხვევაში. ამდენად, აღნიშნული შემსყიდველი ორგანიზაციები აღარ იქნებიან ვალდებული გამოიყენონ „სახელმწიფო შესყიდვის შესახებ“ საქართველოს კანონით დადგენილი სახელმწიფო შესყიდვის ელექტრონული საშუალებები ზემოაღნიშნულ შემთხვევაში და შესაბამისად, გადაიხადონ სატენდერო/საკონკურსო განცხადებისა და სატენდერო/საკონკურსო დოკუმენტაციის გამოქვეყნების საფასური (ამჟამად არსებული 100 ლარი). ამდენად, წარმოდგენილი პროექტი ამ მიმართულებით გამოიწვევს ზემოაღნიშნული უწყებების ბიუჯეტის ხარჯვით ნაწილის დაზოგვას. ამასთან, გავლენის ოდენობა დამოკიდებულია ამ უწყებების მიერ განხორციელებულ შესყიდვის ოდენობაზე.

აღსანიშნავია, რომ წარმოდგენილი კანონპროექტით გათვალისწინებულია ჩარჩომეთანხმებისა და ელექტრონული კატალოგის დანერგვა. აღნიშნული მიზნად ისახავს სახელმწიფო შესყიდვების პროცესის გამარტივებასა და სტანდარტიზაციას, რაც შემსყიდველ ორგანიზაციებს საშუალებას მისცემს შეამცირონ განმეორებითი სატენდერო პროცედურების განხორციელებასთან დაკავშირებული ადმინისტრაციული და ოპერაციული ხარჯები. აღნიშნული მექანიზმების გამოყენება, რიგ შემთხვევებში, უზრუნველყოფს შესყიდვის ერთეულის ფასის ოპტიმიზაციასაც და ხელს უწყობს შესყიდვების უფრო ეფექტიან დაგეგმვას. ამასთან, აღნიშნული ინსტრუმენტების გამოყენება არ ქმნის დამატებით საბიუჯეტო ვალდებულებებს და მათი გავლენა ბიუჯეტის ხარჯვით ნაწილზე ძირითადად ხასიათდება ოპერაციული ეფექტიანობის ზრდითა და პროცესების ხარჯთეფექტიანობით. შესაბამისად, მოსალოდნელია დადებითი ეფექტი რესურსების დაზოგვისა და მათი უფრო რაციონალური გამოყენების მიმართულებით, თუმცა გავლენის ოდენობა დამოკიდებულია შემსყიდველი ორგანიზაციების მიერ განხორციელებული შესყიდვის ოდენობაზე, რომელთა მიმართებითაც გამოიყენებენ ზემოაღნიშნული სახელმწიფო შესყიდვის ინსტრუმენტებს.

დამატებით, საგულისხმოა, რომ წარმოდგენილი პროექტით იცვლება საზღვარგარეთ ავტოსატრანსპორტო საშუალებების სახელმწიფო შესყიდვებთან დაკავშირებული გამონაკლისის ფორმულირება, კერძოდ ამჟამად მითითებული ტერმინი - „საქართველოს სახელმწიფო უსაფრთხოების სამსახური“ ჩანაცვლებულია ტერმინით - „საქართველოს სახელმწიფო უსაფრთხოების სამსახურის სისტემა“, რაც გამონაკლისის ფარგლებს აფართოებს და მოიცავს სახელმწიფო უსაფრთხოების სამსახურის სისტემაში შემავალ შესაბამის უწყებებს/დანაყოფებსაც. შესაბამისად, ფართოვდება იმ სუბიექტთა წრე, რომლებზეც აღნიშნული გამონაკლისი გავრცელდება, რაც პოტენციურად ზრდის იმ შესყიდვების მოცულობას, რომლებიც აღარ დაექვემდებარება კანონით დადგენილ პროცედურებს. ამდენად, საქართველოს სახელმწიფო უსაფრთხოების სამსახურის სისტემაში შემავალი შემსყიდველი ორგანიზაციები აღარ იქნებიან ვალდებული გამოიყენონ „სახელმწიფო შესყიდვის შესახებ“ საქართველოს კანონით დადგენილი სახელმწიფო შესყიდვის ელექტრონული საშუალებები აღნიშნული მომსახურების შესყიდვისას, გამოაქვეყნონ სატენდერო/საკონკურსო განცხადება, აგრეთვე, სატენდერო/საკონკურსო დოკუმენტაცია და შესაბამისად, გადაიხადონ საფასური (ამჟამად არსებული 100 ლარი). შესაბამისად, წარმოდგენილი პროექტი ამ მიმართულებით გამოიწვევს აღნიშნული უწყებების ბიუჯეტის

ხარჯვით ნაწილის დაზოგვას. ამასთან, გავლენის ოდენობა დამოკიდებულია ამ უწყებების მიერ განხორციელებული შესყიდვის ოდენობაზე.

გარდა ზემოაღნიშნულისა, საგულისხმოა, რომ წარმოდგენილი კანონპროექტი ითვალისწინებს სახელმწიფო შესყიდვის ხელშეკრულების ცვლილების შესაძლებლობას, თუ ცვლილება ხორციელდება ფასთა ინდექსაციის საფუძველზე, საქართველოს მთავრობის სამართლებრივი აქტის შესაბამისად. საგულისხმოა, რომ ფასთა ინდექსაციის მექანიზმის შემოღება მიზნად ისახავს გრძელვადიანი ან შესრულების პროცესში არსებული სახელმწიფო შესყიდვების ხელშეკრულებების ეკონომიკური ბალანსის შენარჩუნებას საბაზრო კონიუნქტორის მიზნებიდან გამომდინარე. ბიუჯეტის ხარჯვით ნაწილზე გავლენის თვალსაზრისით, ინდექსაცია შესაძლოა დაკავშირებული იყოს ხელშეკრულების ღირებულების კორექტირებასთან, რამაც შესაძლოა გამოიწვიოს შესაბამისი შემსყიდველი ორგანიზაციის ბიუჯეტის ხარჯვით ნაწილის დაზოგვა, თუმცა ასეთი ცვლილება განხორციელდება მხოლოდ საქართველოს მთავრობის სამართლებრივი აქტით განსაზღვრული წესისა და პირობების შესაბამისად, წინასწარ დადგენილი კრიტერიუმების ფარგლებში. შესაბამისად, გავლენის ოდენობა დამოკიდებული იქნება საქართველოს მთავრობის შესაბამის სამართლებრივ აქტზე.

ბ.დ) სახელმწიფოს ახალი ფინანსური ვალდებულებები, კანონპროექტის გავლენით სახელმწიფოს ან მის სისტემაში არსებული უწყების მიერ მისაღები პირდაპირი ფინანსური ვალდებულებების (საშინაო ან საგარეო ვალდებულებები) მითითებით:

კანონპროექტის მიღება არ ითვალისწინებს სახელმწიფოს ან მის სისტემაში არსებული უწყების მიერ პირდაპირი ფინანსური ვალდებულებების აღებას.

ბ.ე) კანონპროექტის მოსალოდნელი ფინანსური შედეგები იმ პირობების, რომელთა მიმართაც ვრცელდება კანონპროექტის მოქმედება, იმ ფიზიკურ და იურიდიულ პირებზე გავლენის ბუნებისა და მიმართულების მითითებით, რომლებზედაც მოსალოდნელია კანონპროექტით განსაზღვრულ ქმედებებს ჰქონდეს პირდაპირი გავლენა:

კანონპროექტით გათვალისწინებული ახალი ინსტრუმენტები – ელექტრონული კატალოგი და ჩარჩოშეთანხმება, გააფართოებს ეკონომიკური ოპერატორების მონაწილეობისა და კონკურენციის შესაძლებლობებს, რამაც შესაძლოა გამოიწვიოს ახალი კონტრაქტების მოპოვების ზრდას და, შესაბამისად, შემოსავლების გაზრდაც. საგულისხმოა, რომ შესყიდვების პროცესის გამარტივება და ელექტრონიზაცია შეამცირებს ბიუროკრატიულ ხარჯებს (დოკუმენტაციის მომზადება, ადმინისტრაციული პროცედურების ხანგრძლივობა და სხვ.).

საგულისხმოა, რომ ქვეკონტრაქტორებთან დაკავშირებული რეგულაციების გამჭვირვალობა და ერთიანი წესების გავრცელება ყველა მიმწოდებელზე გააუმჯობესებს კონკურენციის პირობებს და გააუმჯობესებს არსებულ ბარიერებს, რაც სტიმულს მისცემს მცირე და საშუალო ბიზნესს, უფრო აქტიურად მიიღონ მონაწილეობა სახელმწიფო შესყიდვებში. კერძოდ, კანონპროექტით დეტალურად წესრიგდება ქვეკონტრაქტორების ჩართულობასთან დაკავშირებული საკითხები, მათ შორის – ინფორმაციის წარდგენის ვალდებულება, ქვეკონტრაქტორის მიერ შესასრულებელი ვალდებულებების მოცულობა, დისკვალიფიკაციის

საფუძვლების შემოწმება, კვალიფიკაციასა და გამოცდილებაზე დაყრდნობის პირობები, კრიტიკული მნიშვნელობის მქონე ვალდებულებების უშუალოდ ძირითადი ეკონომიკური ოპერატორის მიერ შესრულების შესაძლებლობა, აგრეთვე ქვეკონტრაქტორის შეცვლისა და დამატების წესი. აღნიშნული რეგულაციები უზრუნველყოფს როგორც სახელმწიფო შესყიდვების პროცესის მეტ გამჭვირვალობასა და ანგარიშვალდებულებას, ისე ეკონომიკური ოპერატორებისათვის წინასწარ განსაზღვრულ, თანაბარ და პროგნოზირებად პირობებს, რაც ხელს შეუწყობს კონკურენტული გარემოს გაძლიერებასა და კეთილსინდისიერი პრაქტიკის დამკვიდრებას. ამასთან, სახელმწიფო შესყიდვის დარეზერვება გაზრდის შეზღუდული შესაძლებლობის მქონე პირთა ან სხვა მოწყვლადი ჯგუფების წევრთა (მათ შორის, ნაკლებად წარმოდგენილი სქესის პირთა) ჩართულობის შესაძლებლობას სახელმწიფო შესყიდვებში. კერძოდ, კანონპროექტის თანახმად, სახელმწიფო შესყიდვის პროცედურა შესაძლებელია დარეზერვდეს იმ მიმწოდებელთათვის, რომლებიც აკმაყოფილებენ კანონით განსაზღვრულ სპეციფიკურ კრიტერიუმებს, რაც უზრუნველყოფს მიზნობრივი ჯგუფების რეალურ ჩართულობასა და მათი კონკურენტუნარიანობის ზრდას.

გარდა ზემოაღნიშნულისა, ვინაიდან კანონპროექტით, ახლებურად რეგულირდება შავი სიასთან დაკავშირებული საკითხი, კერძოდ, ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენის შემთხვევაში შავ სიაში რეგისტრაციის ვადად, განისაზღვრება 2 (ორი) წელი (ნაცვლად დღეს არსებული 1 წლისა) და ამასთან, სახელმწიფო შესყიდვებში მონაწილეობა ან/და ხელშეკრულების დადება ეკრძალება აგრეთვე ყველა იმ ეკონომიკურ ოპერატორს, რომლის დამფუძნებელი ან/და წილის მფლობელი არის შავ სიაში რეგისტრირებული ეკონომიკური ოპერატორი, აგრეთვე – იმ ეკონომიკურ ოპერატორს, რომელშიც შავ სიაში რეგისტრირებული ეკონომიკური ოპერატორის ხელმძღვანელობასა და წარმომადგენლობაზე უფლებამოსილ პირს იგივე თანამდებობა უკავია ან/და იგი ფლობს კანონქვემდებარე ნორმატიული აქტით განსაზღვრულ წილს, და იმის გათვალისწინებით, რომ შავ სიაში რეგისტრაცია დაკავშირებულია სახელმწიფო შესყიდვის პროცედურებში მონაწილეობის შეზღუდვასთან, შავ სიაში რეგისტრაციის ვადის გაზრდამ, ფინანსური გავლენა შეიძლება იქონიოს სახელმწიფო შესყიდვებში მონაწილეობის მსურველ ეკონომიკურ ოპერატორებზე.

ამავდროულად, რამდენადაც წარმოდგენილი კანონის პროექტით წესდება კანონის მოქმედების სფეროდან დამატებითი გამონაკლისები, წარმოდგენილ კანონპროექტს ამ კუთხით გავლენა ექნება შემსყიდველ ორგანიზაციებზე, ვინაიდან ისინი აღარ იქნებიან ვალდებულნი გამოიყენონ „სახელმწიფო შესყიდვის შესახებ“ საქართველოს კანონით დადგენილი სახელმწიფო შესყიდვის ელექტრონული საშუალებები და აღნიშნული მომსახურების შესყიდვისას, გამოაქვეყნონ სატენდერო/საკონკურსო განცხადება, აგრეთვე, სატენდერო/საკონკურსო დოკუმენტაცია და შესაბამისად, გადაიხადონ საფასური (ამჟამად არსებული 100 ლარი). ამასთან, გავლენის ოდენობა დამოკიდებულია შემსყიდველი ორგანიზაციების მიერ სხვა შემსყიდველი ორგანიზაციისგან იმ ექსკლუზიური მომსახურების შესყიდვის ოდენობაზე, რომლის გაწევის უფლებაც სხვა შემსყიდველ ორგანიზაციას კანონით ან კანონის შესაბამისად მიენიჭა, უმაღლესი საგანმანათლებლო დაწესებულების მიერ არარეზიდენტი დაწესებულებისგან/საერთაშორისო ორგანიზაციისგან საერთაშორისო აკრედიტაციის/ავტორიზაციის/გარე შეფასების მოპოვების მიზნით განსახორციელებელ მომსახურებაზე, აგრეთვე საერთაშორისო ორგანიზაციებში გაწევრებასა და საერთაშორისო

ღონისძიებებში მონაწილეობის საწევრო/სარეგისტრაციო გადასახადების გადახდასთან დაკავშირებული შესყიდვების ოდენობაზე.

ამასთან, საგულისხმოა, რომ წარმოდგენილი კანონპროექტი ითვალისწინებს სახელმწიფო შესყიდვის ხელშეკრულების ცვლილების შესაძლებლობას, თუ ცვლილება ხორციელდება ფასთა ინდექსაციის საფუძველზე, საქართველოს მთავრობის სამართლებრივი აქტის შესაბამისად. საგულისხმოა, რომ ფასთა ინდექსაციის მექანიზმის შემოღება მიზნად ისახავს გრძელვადიანი ან შესრულების პროცესში არსებული სახელმწიფო შესყიდვების ხელშეკრულებების ეკონომიკური ბალანსის შენარჩუნებას, საბაზრო კონიუნქტორის მიზნებიდან გამომდინარე. აღსანიშნავია, რომ ცვლილება დადებით გავლენას მოახდენს ეკონომიკურ ოპერატორებზე, ვინაიდან უზრუნველყოფს ხელშეკრულების შესრულების პროცესში ფასების არსებითი ცვლილებით გამოწვეული ფინანსური რისკების ნაწილობრივ დაბალანსებას და ზრდის გრძელვადიან შესყიდვებში მონაწილეობის პროგნოზირებადობას. ამასთან, გავლენის ოდენობა დამოკიდებულია საქართველოს მთავრობის შესაბამის სამართლებრივ აქტზე და ფასთა ინდექსაციის საფუძველზე ხელშეკრულების ცვლილების საჭიროებაზე.

ბ.ვ) კანონპროექტით დადგენილი გადასახადის, მოსაკრებლის ან სხვა სახის გადასახდელის (ფულადი შენატანის) ოდენობა შესაბამის ბიუჯეტში და ოდენობის განსაზღვრის პრინციპი:

კანონპროექტი არ ითვალისწინებს გადასახადის, მოსაკრებლის ან სხვა სახის გადასახდელის დაწესებას.

ბ¹) ბავშვის უფლებრივ მდგომარეობაზე კანონპროექტის ზეგავლენის შეფასება:

კანონპროექტის მიღება არ იქონიებს ზეგავლენას ბავშვის უფლებრივ მდგომარეობაზე.

ბ²) ქალისა და მამაკაცის თანასწორობის მდგომარეობაზე კანონპროექტის მოსალოდნელი ზეგავლენის შეფასება:

კანონპროექტს არ აქვს მოსალოდნელი ზეგავლენა ქალისა და მამაკაცის თანასწორობის მდგომარეობაზე.

გ) კანონპროექტის მიმართება საერთაშორისო სამართლებრივ სტანდარტებთან:

გ.ა) კანონპროექტის მიმართება ევროკავშირის სამართალთან:

კანონპროექტი არ ეწინააღმდეგება ევროკავშირის სამართალს.

გ.ბ) კანონპროექტის მიმართება საერთაშორისო ორგანიზაციებში საქართველოს წევრობასთან დაკავშირებულ ვალდებულებებთან:

კანონპროექტი არ ეწინააღმდეგება საერთაშორისო ორგანიზაციებში საქართველოს წევრობასთან დაკავშირებულ ვალდებულებებს.

გ.გ) კანონპროექტის მიმართება საქართველოს ორმხრივ და მრავალმხრივ ხელშეკრულებებთან და შეთანხმებებთან, აგრეთვე, ისეთი ხელშეკრულების/შეთანხმების არსებობის შემთხვევაში, რომელსაც უკავშირდება კანონპროექტის მომზადება, – მისი შესაბამისი მუხლი ან/და ნაწილი:

კანონპროექტის მიღება არ ეწინააღმდეგება საქართველოს ორმხრივ და მრავალმხრივ ხელშეკრულებებსა და შეთანხმებებს. აგრეთვე, კანონპროექტი არ უკავშირდება რომელიმე ხელშეკრულებას/შეთანხმებას.

გ.დ) არსებობის შემთხვევაში, ევროკავშირის ის სამართლებრივი აქტი, რომელთან დაახლოების ვალდებულებაც გამომდინარეობს „ერთი მხრივ, საქართველოსა და, მეორე მხრივ, ევროკავშირისა და ევროპის ატომური ენერჯის გაერთიანებას და მათ წევრ სახელმწიფოებს შორის ასოცირების შესახებ შეთანხმებიდან“ ან ევროკავშირთან დადებული საქართველოს სხვა ორმხრივი და მრავალმხრივი ხელშეკრულებებიდან:

ასეთი არ არსებობს.

დ) კანონპროექტის მომზადების პროცესში მიღებული კონსულტაციები:

დ.ა) სახელმწიფო, არასახელმწიფო ან/და საერთაშორისო ორგანიზაცია/დაწესებულება, ექსპერტი, სამუშაო ჯგუფი, რომელმაც მონაწილეობა მიიღო კანონპროექტის შემუშავებაში, ასეთის არსებობის შემთხვევაში:

ასეთი არ არსებობს.

დ.ბ) კანონპროექტის შემუშავებაში მონაწილე ორგანიზაციის/დაწესებულების, სამუშაო ჯგუფის, ექსპერტის შეფასება კანონპროექტის მიმართ, ასეთის არსებობის შემთხვევაში:

ასეთი არ არსებობს.

დ.გ) სხვა ქვეყნების გამოცდილება კანონპროექტის მსგავსი კანონების იმპლემენტაციის სფეროში, იმ გამოცდილების მიმოხილვა, რომელიც მაგალითად იქნა გამოყენებული კანონპროექტის მომზადებისას, ასეთი მიმოხილვის მომზადების შემთხვევაში:

ასეთი მიმოხილვა არ მომზადებულა.

ე) კანონპროექტის ავტორი:

საჯარო სამართლის იურიდიული პირი – სახელმწიფო შესყიდვების სააგენტო.

ვ) კანონპროექტის ინიციატორი:

საქართველოს მთავრობა.